

Schnitzelbank 2001

Zwei Löcher uf em gliiche Zädel,weles isch ächt richtig
Das spillt doch gar kei Role,erscht i 4 Jahr isch das wichtig
Sie händ ja Ziit,sie müend nöd jufle,nume nöd so gschprängt
Z'America äne schaffeds scho am nächschte Presidänt.

Auge wie 2 klöpfti Sicherige,wer chömnt das ächt sii
Puderzucker a de Nase,wo füert das na hii
D'Chuchi vole wiises Pulver ,findet ihr das guet
Es isch nur de Christoph Daum wo Guetzli bache tuet

Sie fröged und sie fröged,sie fröged nume Seich
Sie fröged und sie fröged,da wird der s'Hirni weich
Sie fröged und sie fröged,de Chopf wird langsam schwär
Jetzt händs dann bald kei Frage me,bim wer wird Millionär

Ja sie häd sich g'outed,offiziell und klar
D'Mane müend kei Angscht meh ha,das isch wunderbar
D'Nella Martinetti tuet sich öppis traue
Ab sofort bin ich au lesbisch,und stah nur no uf Fraue

Am drittä Dunschtig im Oktober,da wird s'Vee premiert
Und alls wo Rang und Name hätt,tuet seer interessiert
Doch das Jaar schpändä'n'ich ä Triichle,ich hoff dass ich das schaff
Dämm prominänte Tierliebhaber, mit em schönschte Aff

Dä Seppli und au s'Lotti,bruucheds sapperlotti
Du gseh's uf jeder Foti,all Chind säged das wotti
S'häts wüerkli jede Idiot,ob Grüeni oder Roti
Drum poscht ich mir jetzt hurti,es Kickboard sones Trotti

S'Schlimmscht wo häd chöne passiere,isch wüerkli au passiert
Verreckter no als d'Gripp im Summer,wo sich nie kuriert
Verlaa vo allne guete Chreft,gits nur no böösi Geischer
Ich glaubes nöd es schellt mi schier,dä ZSC isch Meischer

D'NFG häd grossi Sorge,wägem kaputte Glas
Wo amigs a de Fasnacht liit,ume uf dä Strass
Mir Panzis gänd jez eu en Tip,müend Gleser bim Leonardo hole
Dänn wärdets nämmlü nüm gschlisse,sondern eifach gschtole

Läck isch das en Schiisdräck
Wo da im Chreisel staat
Drum lueged mir zur Fasnachtsziit
Däm Gartehaagsalat